



**SCOLA
LUMNEZIA**

218.10

Reglament davart absenzas e congedis

<i>Decisiun</i>	<i>vigur</i>	<i>versiun.</i>	<i>midada</i>
21-07-2014	01-08-2014	1.1	niev
01-09-2016	01-08-2016	1.2	rev.
29-07-2025	01-08-2025	1.3	rev.



Reglament davart absenzas e congedis

Relaschaus dil Cussegl da scola, ils 21 da fenadur 2014, revidius ils 29-07-2025.

Art. 1 Basa legala ed explicaziuns generalas

- 1 Il reglament „absenzas e congedis“ dalla scola Lumnezia se basa silla suandonta basa legala:
 - art. 28, art. 68 ed art. 96 dalla lescha da scola cantunala dil cantun grischun dils 21 da mars 2012
 - art. 12 alinea 17 digl uorden da scola dalla vischnaunca Lumnezia
 - directiva d'absenzas e dispensaziun digl EKUD Nr. 807 dils 5.07.2013
- 2 Las indicaziuns da persunas, funcziuns e professiuns serefereschon ad omisduas schlatteinas, aschi lunsch ch'ei sere resulta buca enzatgei auter ord il senn da quest reglament.
- 3 Cun geniturs ei manegiau „il representant legal“.

Art. 2 Principi

- 1 L'instrucziun en scola e scoletta ein da visitar regularmein e punctualmein ed astga buca vegnir munchedada senza motiv urgent.

Art. 3 Absenzas

- 1 Sco motivs d'absenza valan:
 - malsogna, accident, viseta medicinala (miedi ni dentist) cun confirmaziun da termin
 - dimoras da reconvalescenza e da cura ch'ei necessarias durant il temps da scola per motivs da sanadad
 - greva malsogna, mort e sepultura d'in confamigliar, d'in parents ni da persunas cun ina stretga relaziun persunala
 - fiastas religiusas impurtontas (per il scolar)
 - visetas da posts da cussegliaziun renconuschis ni/e d'autoritads naziunalas, cantunalas e communalas (cun confirmaziun dil termin)
 - prighel da lavinas, relaziuns da vias buc responsablas
- 2 Tier absenzas duei la persuna d'instrucziun responsabla vegnir informada immediatamein via Klapp. Tier absenzas prevesiblas (ex. medii/dentist) vegn la persuna d'instrucziun responsabla informada ordavon.
- 3 Tier absenzas muort malsogna ni accident che cuozzan dapli che 3 dis ni tier absenzas da singuls dis che serepetan savens, sa la direcziun da scola pretender dils geniturs in attestat dil medii.

Art. 4 Sepulturas

- 1 En cass da sepulturas ella vischnaunca Lumnezia vegn dau liber in miezdi ad affons che vulan assister allas funcziuns funeralas. La persuna d'instrucziun da classa sto vegnir informada sche pusseivel in di avon la sepultura. Ils geniturs ein obligai da procurar ch'ils affons che survegnan liber, assistien allas funcziuns funeralas. La survegionza vegn medemamein adossada als geniturs.



Art. 5 Motivs per congedis

1. Sco motivs per congedis valan: (enumeraziun ei buca cumpletta)

- eveniments famigliars da grond'impurtonza (ex. nozzas d'in confamigliar, da parents, ni da persunas cun stretga relaziun persunala, etc.)
- participaziun activa ad occurrenzas sportivas, culturalas, artisticas ni scientificas.
- en funcziun sco „voluntari“ tier occurrenzas publicas (ex. sco commember d'ina uniun)
- activitads dil temps liber¹. Per quei intent dat ei maximalmein 4 mezs dis congedi ad onn.

2. Per igl emprem di da scola dat ei negins congedis!

Art. 6 Cumpetenzas e lubientschas

1. Il purtader da scola sa conceder congedi tochen maximalmein 30 mezs dis da scola per onn da scola, resp. tochen il treidubel dil diember da lecziuns jamnil dil scalem da scola corrispudent (lescha da scola art. 28, ordinaziun dalla lescha da scola art. 25).

2. La direcziun da scola ha la cumpetenzza da lubir congedis.

3. Damondas da congedi ein d'inoltrar a scret e cun argumentaziun sil pli tard 5 dis avon il termin da congedi alla direcziun da scola, via persuna d'instrucziun da classa.

4. La lubientscha per in congedi duei buca esser dependenta dallas prestaziuns en scola, denton duein ils representants legals dil scolar vegnir informai, sche la promoziun da lur affon ei pereclitada. Ord motivs disciplinars e pervia da schliet cumportament sa ina damonda da congedi vegnir refusada.

Art. 7 Congedi per prolungaziun dallas vacanzas

1. Damondas per prolungaziun da vacanzas ein d'inoltrar a scret e cun argumentaziun directamein alla direcziun da scola sil pli tard 30 dis avon il termin da congedi.

Art. 8 Congedis per dapli che 30 mezs dis per onn da scola

1. Congedis che survargan totalmein 15 dis da scola (per onn da scola) ein d'inoltrar directamein agl inspektorat da scola. La damonda ei d'inoltrar a scret e cun argumentaziun sil pli tard 20 dis avon il termin da congedi.

Art. 9 Via legala

1. Encunter decisziuns dalla direcziun da scola en connex cun congedis sa vegnir fatg recuors tier il cussegl da scola enteifer 10 dis. (uorden da scola art. 14)

Art. 10 Fuorma e controlla

1. Damondas da congedi ein d'inoltrar alla persuna d'instrucziun da classa cul formular corrispudent el carnet d'absenzas. Damondas per prolungaziuns da vacanzas ston vegnir formuladas en fuorma da brev ed inoltradas directamein alla direcziun da scola.

¹ Explicaziun: Ei sto setractar dad in'activitad fatga regularmein, sco per exempel in hobi, ni d'ina activitad che stat en stretga relaziun cun la professiun dil bab ni dalla mumma, sco aspectatur tier occurrenzas, ...)



Art. 11 Materia da scola munchentada

1. La materia da scola che vegn munchentada entras in congedi sto vegnir cumpensada. La responsabladad schai tier il scolar, resp. tier ils geniturs.

Art. 12 Surpassament

1. Geniturs che tarmettan buca regularmein lur affons a scola ni che prendan lur affons ord scola senza lubientscha da congedi san vegnir puni cun in castitg da tochen francs 5'000.- sebasond sigl art. 68 ed art. 96 dalla lescha da scola cantunala. La persuna d'instrucziun da classa e la direcziun da scola ein obligai d'annunziar absenzas nunlubidas al cussegl da scola. Davart il castitg corrispudent decida il cussegl da scola.

Art. 13 Fuffernadis

1. Durent il temps da scola vegn il fuffernadi mo lubius sch'igl ei necessari per survegnir ina piazza d'emprendissadi, ni sch'igl ei buca pusseivel da far il fuffernadi durent il temps da vacanzas da scola. La damonda ei da tschentar aschi baul sco pusseivel.
2. La direcziun da scola sa pretender in mussament dil patrùn.

Art. 14 Vigur

1. Quest reglament va en vigur igl 1. d'uost 2014 cun l'approbaziun entras il Cussegl da scola.
2. Ils geniturs vegnan informai davart congedis ed absenzas a caschun dalla sera da geniturs. Ils scolars vegnan informai mintgamai all'entschatta digl onn da scola dalla persuna d'instrucziun da classa.
3. Cun l'entrada en vigur da quest reglament ein las disposiziuns d'auters decrets che stattan en cuntradicziun cun quel abrogadas.

Approbau il reglament entras il Cussegl da scola ils 29-07-2025.

Il presidi:



Nina Capaul, co-presidenta



Gian-Reto Derungs, co-president

L'actuara:



Marianne Derungs